

問經堂叢書

山



蕙蕙乃斯

虎詩贄縞

經訓齋彙板

列女詩并序一卷

江陵 黃紹鳳撰

承德 張毓貞校

昔漢劉向撰列女傳所以培風俗敦倫紀也考隋志有曹大家注又有趙母注列女傳七卷高氏列女傳八卷皇甫謐列女傳六卷綦母邃列女傳七卷曹植列女傳頌一卷繆襲列女讚一卷崇文總目以陳嬰母等十六傳爲後人所附以頌考之每篇皆十五傳耳則凡無頌者宜皆非向所奏書矣夫女子之性情靜則易於感觸讀之者可以啟發人之善心可以懲創人之佚志其功甚偉余少事筆墨於列女傳把玩

不忍釋手顧注之者有人圖畫者有人因仿吳曾詠
史詩之例遂爲題詠惜思力薄弱不能取其人之生
平而論斷之閱月而成非敢與女孝經女史箴相較
而私心嚮往且願與閨閣中共証之

有虞二妃

千秋閭德重英皇滄泐觀型側陋揚二室甫成初見帝
三湘有怨爲依郎何妨畎畝安貧賤歷試風雷祝壽昌
韶樂和聲方奏處揮絃應欲譜求凰

棄母姜嫄

卜筮流傳幻也真寒冰覆翼豈無因郊原履跡生男子

稼穡開基自婦人隘巷平林天早佑封郃居稷命重申
詩稱赫赫垂坤範八百周家重克禋

契母簡狄

其浴元丘水一方雲中飛鳥獻嘉祥偶然忽墜寧無意
縱使懷吞也不妨汝作司徒能輔帝工歌雅頌首生商
有娥本是清華胄可念當年姊妹行

啟母塗山

傳子傳賢本合符庭闈母教是良謨八年啟迪真無忝
四野謳歌信不誣河漢江淮波淼淼辛壬癸甲泣呱呱
史臣珥筆書虞典尙記山名舊是塗

湯妃有藝

競傳內政輔成湯統領宮闈歲月長娶自有藝徵厥德
性能無妬發其祥閨中九嬪思遺行膝下雙丁守義方
治道不妨存駿厲低徊懿教久難忘

周室三母

姜女偕行早入詩太任太姒復承之倉皇走馬緣多難
慷慨奔吳似早知胎教獨先親傳日徽音猶記造舟時
周家三母稱同德文武嗣興亦在斯

衛姑定姜

慈姑送婦望斜暉燕羽差池欵欵飛宥及宗卿能遠患

審將卜兆獨知微文辭富瞻深閨少社稷扶持重器歸
况復疆場堪禦寇犬上皇耳震餘威

齊女傅母

齊侯之子衛侯妻傅母防閑早及笄衣錦不須崇外飾
冶容空自使中迷推之家世儀堪表好及兵戎志已攜
詩詠碩人刪未得長吟直到夕陽西

魯季敬姜

博達誰能莒女同機聲夜永一燈紅降階奉劍心猶懈
獻酒尊賓禮則崇勞力勞心徵古訓爲均爲軸借良工
閨門事蹟尼山重奕禩都欽慈母風

楚子發母

征袍北伐破秦關壯士功成洗甲還記得絕糧分菽粒
難教繞膝近容顏一囊旣驗吳兵解十戰曾傳越卒環
有子款門終謝過承歡還似綵衣斑

鄒孟子母

名垂亞聖教爲先廢學幾如斷織然統紹尼山精六藝
里隣學舍卜三遷擁楹詎必貪榮祿設俎都因結習緣
鉅典崇祠昭配享不徒鄒魯割牲牲

魯三母師

臘盡剛逢歲事無歸寧作計只須臾間中去矣謀諸婦

臺上觀之有大夫晷刻難占天欲雨門閭已入日將哺
竊崇尊號聞丹陛禮別私家論不迂

魏芒慈母

孟陽有女記遺徽慈愛初無異體違後母勤劬遵禮義
吾兒裘馬遜輕肥無端獲譴收囹圜只有懷憂減帶圍
高義當時傳魏闕俱將寸艸答春暉

齊田稷母

上相威權柄獨持逢迎下吏豈無私黃金可結榮華路
白晝寧愁暮夜知一自愛廉聞母誠獨能歸罪耐君思
素飧願取風人義守潔原爲拜獻資

周宣姜后

宣王美政史堪徵姜后賢名衆尚稱脫珥徘徊依永巷
聞雞躑躅剪秋燈三千宮嬪休希寵八百周家數中興
從此早朝看旭旦嗷嗷鴻雁足哀矜

齊桓衛姬

葵丘創霸起臨淄欲伐隣邦出令時執帛強侯皆獻媵
垂旒上相獨陳詞鼓鐘奏罷諸伶散環珮聲稀再拜遲
戚好兵戎旋解釋香閨望色已先知

晉文齊姜

懷安最足困英雄病馬連羣廐欲空奔狄已逢多難日

依秦漸可奉仁風聞之蠶妾謀桑下載以乘車是醉中
天意正教人輔晉揮戈何不諒臣忠

秦穆公姬

強隣請粟爲饑來不意天心偶降災塞上興戎高戰壘
階前釋怒舍靈臺履薪難解私家戀渡水終爲霸國才
唱到渭陽呼舅氏路車差勝贈玫瑰

楚莊樊姬

彎弓馳馬繡羅鞞繼霸莊王本好畋屢獻箴規言逆耳
休教禽獸肉登筵執巾美女供簾外相楚名臣起海邊
悔過虞丘能薦士新來令尹只三年

周南之妻

睢麟風化及周南
治水劬勞恐不堪
過訪比隣陳素語
遠徵虞帝戒懷貪
魴魚有尾君須記
丹鳳離羅我尙諳
家室憂輕王事重
委蛇退食已深慚

宋鮑女宗

丹詔由天號女宗
外妻雖寵往來濃
庶羞酒醴期無忝
組織絲麻計未慵
人守空床因一醮
室留老母慎三從
同行娣姒休相勸
貞順寧爲悅已容

晉趙衰妻

采葑采葑入毛詩
狄女當年早合卺
漫道新人不如故

躋之公族不爲私
從容委體持巾櫛
比儼蓬麻附兔絲
匹耦豈令從閣去
傷心棄婦可無詞

陶荅子妻

不辭數諫恐招尤
夫子惟將富是求
暮歲養姑成厥孝
暮年致盜早爲憂
南山文采因窺豹
北郭宗人枉擊牛
後世名垂師令尹
果然貽福在媵修

柳下惠妻

士師屢黜究如何
與世油油任意過
誅以一言名作惠
傳將百代聖之和
門人拜手空懸儼
女子知心自諷哦
畢竟寬敦能化俗
低徊柳下繞烟蘿

魯黔婁妻

窮士終年覆緼袍堂前師友尚呼號貧堪行樂生能忍
正不從邪死亦豪粟米無煩君后賜酒漿徒使肺肝勞
欲崇褒諡康何損仙去魂兮自可招

齊相御妻

晏子身無三尺長恂恂雅度萬夫望如何擁蓋爲前御
敢不驚心慮後殃執策郎官爭慕義升朝命婦已流芳
高車駟馬非吾有始信謙尊道益光

楚接輿妻

隴畔躬畊素所甘君王聘帛治淮南到門車迹深何限

繞戶機聲久尚堪豈爲求榮登殿閣終思易姓隱烟嵐
戴紕負甌偕夫婦湘水茫茫不厭貪

趙老萊妻

王侯耳熟老萊名門外鑿輿里巷驚北面趨承思變志
南江風物遂餘生木床著席浮家寄蓬室葭牆樂事并
卜築三年成聚落蒙山回首晚霞橫

楚於陵妻

使者持金再拜言聘爲公輔霸中原惟耽几案書兼史
身別鄉關鶴與猿織屨仍安貧士業奉箕還向老妻言
棲遲斗室剛容膝遠害而今只灌園

密康公母

涇上遨遊帶薄暉
珊珊環珮憂殘雲
忽來奔女三爲粲
告以歸王獨不聞
旦夕歡娛忘後顧
山河色并倒前軍
倉皇滅密無多日
始悔從田欲取羣

楚武鄧曼

楚帥全行震莫敖
伐隨君自著征袍
將臨大命余心蕩
欲濟偏師舉趾高
天道早徵傷補木
軍威終抑狃蒲騷
盈虛消息參應澈
閩內知幾詎可逃

許穆夫人

衛女深閨未嫁時
苦言齊大足扶持
舍之在近求之遠

强者爲雄弱者雌
戎狄侵陵孤壘破
楚丘遷徙一軍支
悠悠驅馬經漕邑
歸唁淒涼賦載馳

曹僖氏妻

奔走過曹偶駐輿
出亾重耳孰憐渠
同心善輔謀猷壯
駢脅微窺禮態疎
反璧已明仁是寶
受殮差免食無魚
扶攜老幼門成市
下令軍中特表閭

孫叔敖母

總角嬰兒偶出遊
歸來告母淚橫流
底須放鶴誇丹頂
不礙埋蛇見兩頭
祿寵官階躋令尹
力開茅土佐強侯
穹蒼輔德非求報
享壽頻添海屋籌

晉伯宗妻

識微善計語周詳鄭重州犁得畢羊直辯凌人難免妬
危機及子早須防大夫羣飲斟盃斝老婦遙聞辨莠良
實穀不華言不飾永懷斯論未能忘

衛靈夫人

車聲夜半聽麟麟過闕從容自轉輪盛節本無雙國士
戲言幾有兩賢人公門路馬勤修禮魯酒盈觴賀得臣
誠敬那因昏暮失雞鳴猶未報將晨

齊靈仲子

齊靈初娶魯聲姬儲貳誠爲定國基廢立易常將兆禍

微迎爭寵却含疑娣緣愛重謀先入女覺殃多讓亦宜
高厚被戕公被疾縱然譎諫亦奚爲

魯臧孫母

乘車策馬使他鄉只有施恩一策長多難遺公書臘犬
寸心念母記臧羊冠纓不足應篷首琴瑟誰調欲斷腸
遂發堅兵軍境上遠遊文仲理歸囊

晉羊叔姬

去晉遙依三室深觀人有術在觀心難盈谿壑由貪敗
或類豺狼致禍侵封豕無傳悲樂正攘羊不與瘞墟陰
郎君守正今知否獄訟何妨都吏臨

晉范氏母

上馬踟躕據錦鞍園中多木且盤桓忽陳三悅愚民喜
欲庇千年巨族難告母自誇謀已遂戒兒除詐久斯安
他年智伯終相滅地下哀慈骨未寒

魯公乘妣

紛紛世祿總梯榮將相崇階最繫情未嫁女髮精鑒別
爲傷宗族涕縱橫期年獲咎皆忘禮一國需才莫竊名
揜目那能分黑白過時有待乃稱貞

魯漆室女

倚柱呼號嘯更悲女居漆室果爲誰從旁勸嫁隣間婦

閱歲聞軍塞上帷尚憶家園曾繫馬倏逢晉客致傷葵
河通九里淤三百戰鬪頻興魯事危

蔡人之妻

有喜難逢勿藥占誰謀改適出重簾永懷采采思芣苢
侍疾微微啟鏡奩遣妾何曾遭大故依郎常與慮深疴
不萌去志斯貞順載詠風詩月掛簷

黎莊夫人

春花春艸正芳菲嫁女夫家諷式微唱和詩成聯句祖
絲蘿迹合寸衷違入簾枉縮同心結對酒孤臨白板扉
試與泥中完素志空勞傳母勸將歸

齊孝孟姬

鎮日香閨掩畫屏結縈父母誠丁寧御輪三曲隆坤範
環珮千秋訂禮經覽勝名區紛冠蓋心憎野處少輜駟
倉皇解救重生日貞淑遺風照汗青

息君夫人

戰鬪荆人霸力雄虜將匹配合入深宮愁看水榭波如鏡
怕捲珠簾月似弓憔悴人間還一見追隨地下得重逢
禮無貳醮身俱逝室處雖分穴則同

齊杞梁妻

浪打空堤水怒鳴貞魂千載尚如生傲廬猶在休成禮

雉堞雖高亦解崩涕類鶉啼都灑血身隨波泛似騎鯨
親無五屬將何倚好結幽宮匹偶情

楚平伯羸

伯莒稱戈畏闔閭後宮戰慄未安居手持白刃情能割
命託黃泉志可舒永巷迴風真寂爾終朝望月歎歸與
秦兵救楚長驅入合璧重看依玉除

楚昭貞姜

鑿輅遊觀去未回夫人翹首上層臺滔滔巨浪浮天至
滾滾蒼濤蹴地來奉召恐爲波所激忘符空有命相催
身隨流水完貞素詎爲偷生避後災

楚白貞姬

白公身後冷秋窗紡績終宵影對缸生已調琴依綠水
沒當守冢薦紅豷在來門外車三十麾却懷中璧一雙
使者言歸君亦悟特加寵號重鄉邦

衛宗二順

馬鬣墳高記衛宗綿延奉祀出秦封孤兒繞膝同呼母
八載承歡獨佐饗出舍甘心居退讓陳詞數典益虔恭
將戕守順夫人懼供養年年帶月春

魯寡陶嬰

陶門有女懷貞一魯國聞風願結歡繞樹尋巢歌寡鵠

臨粧攬鏡歎孤鸞頻頻子舍衣添線札札機聲月上欄
爲戀故雄當泣下自甘獨宿枕衾單

梁寡高行

月彩霜姿畫不如奈何偕老願終虛貴人爭獻三珠樹
使者還陳五色書竟爾操刀因事急曾禁劓鼻是刑餘
尚留一息憐孤幼高行聲名起令譽

陳寡孝婦

男兒介冑去從軍垂老萱堂自此分顧婦丁寧無別語
恐親切怛不堪聞旣歸絕塞魂空返莫勸重昏願孔殷
二十八年旌孝養淮陽太守特陳君

魯孝義保

伯御興兵自魯宮欲殲儲貳及黃童易衣豈覺形骸別
臥榻還疑面貌同滅迹奔逃徵大義乘危保抱見孤忠
逾年主國居尊位子代咸推保母功

楚成鄭晉

登臺粉黛隱花旛衆目疑眸宿霧繁不顧尊嚴儀是表
非貪爵祿禮爲藩迷離黑白都顛倒廢立宮闈自擾煩
令尹陳詞終逆耳可憐被難食熊蹯

晉圉懷羸

被質秦宮歲幾更間居六載伴懷羸倦飛鳥解歸巢樂

久客人知返國榮攜手尚思車共載秘謀惟使鶴孤行
未能偕老緣君命善處人間匹偶情

楚昭越姬

乘駟馳驅樂燕遊登臺雲夢望中收耽淫那屑同身殉
復禮能將素志酬夾日飛鳥終欲驗微雲過塞豈忘憂
蔡姬竟作偷生策閉壁爭迎亦有由

蓋將之妻

戎兵滅蓋寶刀銛號今分明約束嚴被救同人除巨刃
歸來重語隔重簾主憂臣辱生何補婦節夫忠義竝兼
祠以太牢金百鎰且榮阿弟寵恩沾

魯義姑姊

郊原烽火照王城避難頑童逐隊行逼近干戈難兩護
奔馳山麓願同生獨懷猶子存公義甘棄佳兒詎矯情
束帛喜從丹陛降重圍頓解止齊兵

代趙夫人

深祕機權殘忍徒獨登夏屋胡爲乎以斗擊殺復迎姊
呼天自殉知有夫命絕靡筭塋粉黛謀先膳宰藏庖厨
舉兵平代者誰子地下得從斯怨無

齊義繼母

何人格鬪沒荒郊兄弟雙雙立路均試訊危機如一口

願罹重譴是同袍吏求主從真回惑母念公私豈混淆
爲憶夫言留假子勅書竝赦費松膠

魯秋潔婦

五日新婚竟裹糧歸來里舍鬱相望疑眸遠覩途中女
織手輕探陌上桑節重饋金終不改恩深入水亦何妨
還家始悔停車誤薄義空如柳絮狂

周主忠妾

仕宦將歸入室隅妻封醢酒作清酤胸藏秘策殲周主
智解危機杖女奴肺腑難言聊獻竿怒管不避故傾壺
未甘逆禮爲婚配厚幣相酬美且都

魏節乳母

吹角鳴笳破魏城，徧求儲貳倍心驚。故臣乍見猶相識，乳母潛逃亦倖生。懷抱願將身障蔽，追捕竟被矢縱橫。太牢賜祀隆卿禮，慈愛溫良沒則榮。

梁節姑姊

葑屋茅簷被祝融，不堪嚮邇矧黃童。苦尋阿姪搜無迹，誤得姣兒索未終。惶恐不辭親赴火，流傳爭與誦遺風。九泉面目真無愧，舍命無渝本至公。

珠崖二義

作令魂從萬里還，十三女子尚低鬟。幼男好弄藏珠臂，

後母偕行至海關。坐法互甘刀劍下，憐情不問鏡奩間。終朝士卒同揮淚，二義高風感庶頑。

邵陽友姊

良人與友共陰謀，事秘經年隔數秋。爲奪牛眠營父葬，自經羅帶復兄讐。塋廡宿怨今方覺，枕席私恩不可留。延壽抱慚王表墓，紫荊花放映松楸。

京師節女

流傳節女是長安，積憤雖深設計難。巧伺夫家迷逕道，詭持父命逞凶殘。漫爲許諾甘身代，樂就遲眠啟戶看。夜半樓東頭已斷，仇人哀痛曉來觀。

齊管妾媵

寧戚方思見至尊停輿薄暮宿東門
嗚嗚響咽歆牛角
浩浩聲稀驗水痕返屋深憂迷所謂解詩有味可重論
廟堂齋戒承君召博引從知故事存

楚江乙母

不料宮中巨盜來罪歸郢守亦奇哉無何老母勤收護
竟被偷兒費剪裁亡布八尋誰受過賜金千鎰肯貪財
九重復荷羔裘寵諷喻真如濟世才

晉弓工妻

弓人治角已三年晉主猶難一札穿臣罪當誅歸市肆

芻蕘可採拜雲天勞生屢覩陰陽際妙手頻施左右前
丹陛霽顏夫免咎牛羊葭葦念肫然

齊傷槐女

靈根本是十年栽君令重申犯古槐映日龍旂穿影去
臨風豹尾拂枝來忽逢沉醉傷嘉木却訝宏恩愛散材
爲告貴人輸貴樹頓寬父譴繫囚開

楚野辨女

野徑但容雲一縷行人難辨路三叉遠遊寵結茱萸綱
近擊爭催錦繡車犯怒欲明村女罪陳詞應爲僕夫加
汗顏結舌還相問不慕明珠節可誇

阿谷處女

孔氏南遊近碧潯垂髫女子浣淵深一清一濁揚盃尊
三沐三薰調素琴絺綌尚思經緯意波濤猶奏管絃音
達情知禮因嘉許阿谷才名誦至今

趙津女娟

楚江津吏醉如泥節鉞經過渡欲迷餘瀝貪嘗寬父譴
賤軀易罪畏人詆臨波用楫驚鷗起高唱凌風和鳥啼
湯武乘駮前日事還家納帛畫眉齊

趙佛肸母

橫兵佛肸叛中牟白髮哀親亦被收豈畏繡衣終執法

獨趨閭闔解深仇暴臣暴子寧無別爲罪爲功果孰侔
士長不須重問故一言能釋倚門愁

齊威虞姬

踐位難除是佞諛薦才反致墮深誅層臺欲閉長門月
隘巷寧通四達衢園李正寬常悚懼田瓜曳屨慎奔趨
皇天鑒佑能昭雪北郭先生是大儒

齊鍾離春

白頭深目歎無鹽自謁王門望寶簾立發隱書還未見
獨陳君患實何嫌漸臺遂廢餘空瓦洗甲初歌買短鎌
卜吉合歡尊內后恥同粉黛啟香奩

齊宿瘤女

鑿輅遨遊樂未央道途童叟遠相望如何東郭乘飛蓋
無復西郊採穉桑出令可消強晉楚出官不改舊衣裳
諸姬掩口母嗤笑聖女諄諄畫策長

齊孤逐女

鄉里誰憐憔悴容君王輟食禮虔恭寓言作室先營柱
大抵微情好比龍魚目雖能成以事牛鳴難使類相從
昔年五逐還三逐合吉剛乘臘酒濃

楚處莊姪

屈原旣放賦離騷勸主南遊不憚勞伏幟女童初請謁

乘車帝后荷恩褒魚龍氣失傷鱗尾鄢郢師多建羽旄
五百里中勤返駕人民被褐免悲號

齊女徐吾

夜夜機聲共結隣中宵剪燭奈家貧流雲影射花先放
曉露光搖燄尚新東壁餘光何所借西山暮景與誰親
一人損益知無幾豹髓蘭膏四座春

齊太倉女

誰言生女異生男剛足傾顛正未堪赴闕陳書寬重咎
聞言下詔匪空談衣冠畫處神先懾支體傷時內不慙
漢代肉刑從此去閭閻湛露已深覃

周郊夫人

尹固當年遇晉師出奔典籍亦隨之郊原忽值高車過
城闕還看羽檄馳早卜禍災三歲後正逢星紀卅年遲
鑒觀不爽惟天道豈遂茫茫無所知

陳辯女

柔柔采采倚墻隈遂發高歌詠有梅奉使輶軒曾駐馬
出羣釵珥尚依槐頻年師旅民都憊是處饑荒艸欲摧
太息鴟音休萃止詩章往復首重回

聶政姊

匕首新礪刺相公青齊勇士氣英雄暴尸不惜千金賞

披面寧圖百世功跋涉赴韓申隱願殷勤告吏吐愚衷
揮刀已逝芳魂在颯颯寒威起烈風

王孫氏母

十五兒童正弱齡羔羊素食履王庭國人討賊心無主
老母依閭日不停肆上從征齊右袒市中出令共傾聽
旣誅淖齒君仇復旦暮歸來繞戶庭

陳嬰母

陳嬰長者令東陽二萬人推一國王暴得大名應有懼
邈諸先世未能忘業成博得封侯印功就參將政事堂
歸拜漢廷非項氏果符寵賜邑呼裳

王陵母

丞相初爲縣邑豪壯夫起沛試弓刀監軍尚灑慈親淚
敵國空傳使者旄仗劔明心無二志烹葵肆毒豈同袍
河山定鼎勲名重奕禩承恩甲第高

張湯母

好持文法絕苞苴怨積仇深遂上書厚葬有情封馬鬣
臨表無椁載牛車九重盡案三長史四野寧悲上相間
爲語階前諸子弟惡言欲避究何如

雋不疑母

決獄年年總慎刑身爲大尹每拘囚攜將尺木能無用

話到桁楊不忍聽喜怒變遷因執讞笑言諧暢鬧芳庭
循良作吏由坤教聽訟方知辨渭涇

楊夫人

定謀通使大司農聞報驚惶莫所從偶出更衣言未決
但看揮汗興難濃懷疑國事將何補參語神機幸早逢
昌邑廢亡居市月忠魂遂益五花封

嚴延年母

朔風烈烈五更寒東海魚軒值臘殘閉閣未窺慈面母
報囚差似逆風翰一心服罪方歸府數責苛刑自免冠
行矣掃除坵隴地他年棄市倍心酸

漢馮昭儀

選嬪曾經入後宮好田鬪獸試彎弓驚惶左右看攀檻
障蔽君王不避熊力猛祇防依御坐面慙誰復惜微躬
彤廷嗟歎彌加敬于狩先徵報國忠

王章妻女

書生涕泣臥牛衣京兆官階屢賜緋日食封章陳帝闕
仇深繫獄別羅幃呼聲八九囚常數罪徒妻兒身共依
賴有將軍復田宅卷舒當日早知幾

班婕妤

漢帝乘間每好遊苦辭同輦載黃驪挾邪詛呪寧蒙福

痛憫繁華爲寡尤長信宮中春艸徧朝陽殿裏暮雲收
羽觴紈素都無怨賦就還從醉裏謳

漢孝平王后

權臣握政翠華臨授璽登車自上林延壽門高曾御輦
大司徒貴盡橫簪逾年篡逆奸雄得盛怒鞭笞廢疾侵
官殿焚燒誅莽日欲投烈火抱孤衾

梁鴻妻

陋貌寧求悅已容俟光節操乃情鍾入門七日衣新飾
遁迹千山繡懶縫試鼓枯桐乘水漲常依野雄帶雲春
而今競羨齊眉事樵髻簪衣禮甚恭

明德馬后

將畧誰同馬伏波岐嶷少女聞儀多裁成家裂甘縫線
服御麓疏鄙曳羅漢紀初鄱名馬獻楚辭竟讀斷鴻過
上言減獄陳忠厚親率宮中氣象和

梁夫人嫔

用賀青宮帝胄存詔書忽下與誰論年逾七十人還健
路隔重山火尚温改卜西陵尊后位封侯上國耀家門
應知舉室團圞會共沐天朝再造恩

△室黃恭人張恭人合傳

飛華別浦鶴怨瑤琴落葉空堦鸞銷珠鏡生前并立

差如姊妹之行地下偕歸竟結刀砧之伴春來鬪草
仍許同心秋至聽鴻自憐孤影維冬徂夏方改歲而
兩賦悼亾以昔視今甫過眼而重驚寡偶風下簾鈎
之半人殊燕侶之雙藉此駢詞爲之合傳黃恭人者
生於貴胄長自名門嚴君早掇巍科慈母夙嫻義訓
終鮮兄弟悲曙後之一星雖有絲麻伴燈前之二老
從媒判合爾我都是垂髫以地區分彼此遂成遠夢
齊烟九點東郡趨庭積氣千盤南樓縱目無何請期
納吉長途遠奉潘輿而月計程短棹頻呼杜酒輕舟
過處啼不住之猿聲小鳥窺時下無邊之木葉高燒

銀燭人贅華堂滿酌金尊華依錦字山抹微雲之句
女婿留辭書應曝腹之言狂夫欲笑省親當去畫舫
并載香車別母誰憐執手俱垂長淚此則訂鴛鸞之
始皆足縈肺腑之中者也及夫牛首山邊石頭城畔
聽五更之漏箭并日親操和百甕之酸醎羹湯自試
少而善病我亦憐卿性頗好閒心原是佛偶拈詩筆
柳絮飛乎間釋梵音梅子熟矣迨遷之城北而猶是
江南地隣大小長干牕納往來明月女著孝經之冊
祝高堂共享遐齡郵傳凶問之書痛遠道未親侍疾
三冬別去孤兒之涕泗沾巾萬里歸來少婦之愁顏

攬鏡沉痾不起難加續命之絲隻影何堪已乏返魂
之術機聲竟斷阿母猶匆匆以思乳汁難尋嬌女尚
呱呱而泣是豈九原可樂呼侶偕遊頓教兩載未周
招魂屢賦痛其曷已人孰無情殆真命不可知誰謂
一之爲甚張恭人者姓本星辰之列家與山海爲隣
世締婚姻久知禮義奉庭前之母教作女大家守閨
內之師傅稱鍼博士雲鬟照水幾同新月睂灣羅袖
搖風畧比柔荑手滑猶記于歸之歲恰逢弱冠之時
兩姓初交絲羅又結三朝厨下食性早諳待僕婢以
和不聞鞭撻事姑嫜以敬非飾儀容札札中宵紡塼

列女詩
月墮蕭蕭四壁鏡檻風低食味頗馱辛羶何妨茹素
粧面自羞粉黛不事塗朱夜雨同聽愛他新咏清泉
手淪伴我編書祖庭最喜含飴誕彌厥月子舍初能
學語惟有歷年竹正生孫松皆成叟矢女箴而不愧
佩閭德以何慚彼往事能不思之其力行有如此者
奈何藥爐撥火板屋支床參苓屢問醫巫七箸惟依
侍女白頭誰共離愁已滿琴心碧海先遊瘦質應寬
帶眼瓊華入砌觸處生悲雪片侵檐感時揮涕棹牽
荇岸憎看桃葉桃根馬踏蘭畦怕值春風春雨此日
身飛仙闕出世離塵他年學赴名場癡兒覓母腸如

猿斷淚似蟾枯欲屬壙于佳城更縈情于破鏡牽衣
繞膝不忍呼號視膳承顏強爲歡慰尚賴遺音未杳
因爲搦管以書承德孫馮翼撰

列女詩并序一卷

男 豫謙 恭校

書